

Namminersornerullutik Oqartussat nalunaarutaat Piareersarfinni qitiusumik ingerlatsiviit suliaminnik ingerlatsinerat il.il. naliliisarneq pillugu

Suliffissaaleqisunik sulilersitsiniarneq pillugu Inatsisartut peqqussutaanni nr. 14, 12. november 2001-imeersumi § 14, imm. 3 naapertorlugu, aamma Suliffeqarnermi innersuussisarneq il.il. pillugit Inatsisartut peqqussutaanni nr. 10, 18. december 2003-imeersumi § 2, imm. 2, § 3, imm. 3, § 5, imm. 5, aammalu § 12, imm. 2 naapertorlugit aalajangersarneqarput:

Piareersarfiit pilersinneqartarnerat akisussaaffillu

§ 1. Kommunimi suliffeqarnermi ilinniarsimasutsikkullu suliniutit nukittorsarsinnaajumallugit kommunalbestyrelsi qitiusumik Piareersarfiit ingerlatsiviannik pilersitsisinnaavoq, suliffissarsiuussisarnermi, ilinniagaqarnissamik suliffeqalernissamik, piginnaangorsaanermik sulisorisallu nutaamik ilinniagaqarnissaannut suliniutitsigut siunnersuisinnaajumalluni, tassunga ilanngullugit pineqartut ataasiakkaarlugit suliniuteqarfigineqarnissaannut inuttut pilersaarusiuussineq, ilinniagaqarnissamik suliffeqalernissamilluunniit siunertaqartoq.

§ 2. Kommunalbestyrelsip akisussaaffigaa Piareersarfiup pilersinneqarnera aamma ingerlanneqarnera Piareersarfimmilu suliniutit pingaarnertigut tulleriiaarneqarnerat.

Isumaqatigiissuteqarnermi tunngaviusut

§ 3. Suliffeqarnermut Inuussutissarsiuutinullu Ilinniartitaanermut Pisortaqarfiup aamma kommunalbestyrelsip kiffartuussinissamut isumaqatigiissut naammassisanut atasumik isumaqatigiissutaasoq suliarissavaat, tassanilu Piareersarfiup suliasai immikkuualuttuulu aalajangersarlugit.

Imm. 2. Kiffartuussinermut isumaqatigiissummi minnerpaamik nalunaarneqarsimassapput:

- 1) Suliffeqarnermi ilinniartitaanermilu suliniutissani angusassatut siunnerfigisat.
- 2) Suliffeqarnermi ilinniartitaanermilu sullitassatut siunnerfigisat.
- 3) Ingerlatsineranut aningaasartuutitut tapiissutissat aningaasanut inatsimmi akuersissut tunngavigalugit.
- 4) Naliliinerni uuttuutissat suuneri.
- 5) Kiffartuussinissamut isumaqatigiissutit sivilissusissaa.

§ 4. Suliffeqarnermut Inuussutissarsiuutinullu Ilinniartitaanermut Pisortaqarfiup kiffartuussinissamut isumaqatigiissut atorunnaarsissinnaavaa, §§-it 6 aamma 7 naapertorlugit nalunaarusiortoqanngippat.

Imm. 2. Kiffartuussinermi isumaqatigiissummi aalajangersakkanik unioqqutitsisoqartillugu pisussaaffiliisinnaaneq kiffartuussinermut isumaqatigiissummi aalajangersaavigineqassaaq.

§ 5. Kommunalbestyrelsip ukiumoortumik kiffartuussinermut isumaqatigiisummi pisussaaffiit naammassineqarsimanerat pillugu Suliffeqarnermut Inuussutissarsiutinullu Ilinniartitaanermut Pisortaqarfimmut nalunaarusiortassaaq, nalunaarullu ingerlatsinermut aningaasaliissutit naatsorsuusiorterannut ilanngullugu nalunaarut ukiumoortumik nassiuttassavaa, § 13 naapertorlugu.

Naliliinissami paasissutissanik nalunaaruteqartarnej

§ 6. Piareersarfiit suliaannik naliliinissamut atorneqartussanik kommunalbestyrelsip minnerpaamik ukiup affakkaartumik 1/1 aamma 1/7 makkua Suliffeqarnermut Inuussutissarsiutinullu Ilinniartitaanermut Pisortaqarfimmut nalunaarutigisassavaat:

- 1) Inuussutissarsiutinut ilinniartitaanermut qinnuteqartut amerlassusii, tassunga ilanngullugit ilinniagaqalartussatut akuerineqartut amerlassusii, inuussutissarsiutinut ilinniartitaanerni ilinniarnerminnik aallartitsisut amerlassusii, kiisalu akuerineqartunit ilinniagassaminnik aallartitinngitsoornerit sunik peqquteqarnersut.
- 2) Ilinniagaqarnissamut inissat qassit Piareersarfimmut immikkoortinneqarsimanersut, inissallu qassit atorneqarnersut. Ilinniagaqarnissamut inissat qassit pineqarnersut imatut paasineqassaaq Ilinniagaqartunut inissat ilinniagaqarnersiutitalerlugit Suliffeqarnermut Inuussutissarsiutinullu Ilinniartitaanermut Pisortaqarfimmit akuersissutigineqarsimasut.
- 3) Pineqartut ineriartornissaannut pilersarusiat Piareersarfimmik atuisunut tamanut suliarineqarsimanersut.
- 4) Suliffissaaleqisut qassiineri.
- 5) Suliffissaaleqisut qassit suliffeqarnermi sulilernissamut piareersimasuunersut.
- 6) Inuit qassit Piareersarfiup susassaqrifiini pikkorissarnissamut innersuunneqarsimanersut.
- 7) Inuit qassit ilinniagaqalernissamut piareersarnissamut ilinniakkanullu ingerlaqqiffiusunut innersuunneqarsimanersut.
- 8) Suliffissaaleqisut qassit suliffissamut innersuunneqarsimanersut.
- 9) Suliffissaaleqisut qassit suliffeqalersimanersut.
- 10) Sulisinnaannqorsarneqartut amerlassusiat.
- 11) Piareersarfiup suliffeqarnermut ilinniartitaanermullu sammisunik suliniutai, Suliffeqarnermut Inuussutissarsiutinullu Ilinniartitaanermut Pisortaqarfiup ilitersuutai naapertorlugit.
- 12) Nalunaaquttap akunneri suliffiusut pillugit ilinniartitsisut suliassanut pilersaarutaat aallaavigalugit nalunaarsuutit.
- 13) Piffissap atuartitsinermut siunnersuinerimullu atorneqartup annertussusia pillugu nalunaarsuutit.
- 14) Suleqateqartoqarsimappat suleqatigisimasat pillugit nalunaarsuutit.

Imm. 2. Minnerpaamik imm. 1-imi nalunaaruteqarnerit pineqartut ilaat ataaseq aamma imaqassaaq

- 1) Piareersarfimmi suliat pillugit ataatsimut naliliinermik,
- 2) Piareersarfimmut sammisumik kommunip nammineq suliniutaasa naliliiffigineqarnerannik, aammalu
- 3) kommunip nammineq suliffeqarnermi ilinniartitaanermilu 15-25-inik ukiulinnut suliniutaanut tungasumik ataatsimut takussutissiinermik.

§ 7. Kommunalbestyrelsip § 6-imi imm. 1-imi nalunaarusiortarnera qarasaasiat atorlugit programmit Suliffeqarnermut Inuussutissarsiutinullu Ilinniartitaanermut Pisortaqarfimmit atugassannqortinneqarsimasut tungavigalugit ingerlanneqassaaq. Kommunalbestyrelsip aamma § 6, imm. 2 naapertorlugu naliliineq nassiutissavaa.

Imm. 2. Kommunalbestyrelsip isumannaassavaa paasissutissat nassiunneqartut eqqortuuneri nutaajunerilu.

§ 8. Suliffeqarnermut Inuussutissarsiutinullu Ilinniartitaanermut Pisortaqarfiup nakkutilliissaaq kommunalbestyrelsimit paasissutissat nalunaarutigineqartut pillugit.

§ 9. Paasissutissat nalunaarsorneqartut Pisortaqarfimmut nassiunneqartut kiffartuussinissamut isumaqatigiisummi anguniagassatut aalajangersarneqarsimasunut sanilliunneqassapput, Piareersarfiup anguniagassaatut siunniunneqartunut naapertuuneri nalilersorsinnaajumallugu.

Tapiissutit naatsorsuutillu

§ 10. Aningaasanut inatsimmi aningaasaliissutaasut iluanni Namminersornerullutik Oqartussat Piareersarfimmut ingerlatsinermit tapiissuteqassapput, kiffartuussinermut isumaqatigiisummi suliaassat aalajangersarneqarsimasut suliarineqarnissaat siunertaralugu.

§ 11. Ingerlatsinermit aningaasartuutitut tapiissuteqarnermi piumasaqaataavoq kommunalbestyrelsip

1) Piareersarfimmi suliaassat suliarineqarnissaannut sulisussanik atorfinittisinissaa,

2) Piareersarfimmut naleqquttunik ininik isumaginninnera, aammalu

3) ukiumoortumik aningaasartuutissanut missingersuusiornermi qitiusumik ingerlatsiviup aningaasartuutissaanut missingersuusiortarneq.

4) §§-it 6 aamma 7 naapertorlugu nalunaarusiortarnissaminik isumaginnittarnera, aammalu § 13 naapertorlugu naatsorsuutitik nassiussisarnera.

§ 12. Ingerlatsinermit aningaasartuutitut tapiissutit akuersissutigineqartarlutillu aqunneqassapput Suliffeqarnermut Inuussutissarsiutinullu Ilinniartitaanermut Pisortaqarfimmit.

Imm. 2. Ingerlatsinermit tapiissutit 80 %-ii ukiut tamaasa kingusinnerpaamik 1. februar tunniunneqassapput, ukiumullu aningaasanut inatsisip atuuffianut tapiissutaallutik.

Imm. 3. Ingerlatsinermit tapiissutit sinneri 1. oktober tunniunneqassapput, kiffartuussinissamut isumaqatigiisummi anguniagassatut siunnerfiit naammassineqarpata.

§ 13. Kommunalbestyrelsi ukiut tamaasa 1. februar nallertinnagu ukiumi siuliani ingerlatsinermit tapiissutit akuersissutigineqarsimasut naatsorsuutaannik nassiussaqaartassaaq.

§ 14. Suliffeqarnermut Inuussutissarsiutinullu Ilinniartitaanermut Pisortaqarfiup nakkutigissavaa ingerlatsinermit aningaasaliissutit tapiissutigineqartut atorneqarnerat.

Imm. 2. Paasineqassagualarpat ingerlatsinermit tapiissutit akuersissutigineqarnertik saneqqullugu allanut atorneqartut, Suliffeqarnermut Inuussutissarsiutinullu Ilinniartitaanermut Pisortaqarfiup ingerlatsinermit tapiissutitik tunniussisarneq unitissinnaavaa, piumasaralugulu ingerlatsinermit tapiissutit tamakkerlugit ilaannakortumilluunniit utertinneqarnissaat.

Atortuulerfia

§ 15. Nalunaarut una atortuulerpoq 1. november 2007.

Imm. 2. Tassunga ilutigitillugu Namminersornerullutik Oqartussat kommunini inuusuttut sulliviinut tapiissutit pillugu nalunaarutaat nr. 37, 29. december 1995-imeersoq atorunnaarpoq.

Siverth K. Heilmann

/

Palle Frederiksen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut